

# CAPITVLAIRE

AVQUEL EST TRAITE'

QV'VN HOMME N'AY  
SANS TESTICVLES APPA-  
rens, & qui ha neantmoins toutes les  
autres marques de virilité: est capa-  
ble des œuures du Mariage.

PAR

SEBASTIAN ROVLLIARD  
*de Melun, Aduocat en Parlement.*




72024

72,024

A PARIS,

Chez CLAYDE MOREL rue S. Iacques,  
à l'enseigne de la Fontaine.

1600.



CALIFORNIA

THE STATE OF CALIFORNIA

DO hereby certify that

the within and foregoing

is a true and correct

copy of the original

filed in the office of

the Secretary of State

this 1st day of January

1905.

WITNESSED my hand and

the seal of the State of

California at the City of

San Francisco, this 1st

day of January, 1905.

JOHN W. WATKINS,

Secretary of State.



# CAPITVLAIRE

OV

Recueil des principaux chefs du  
procès d'entre le S. B. D. &c.  
appellant de Messieurs les dele-  
guez de la P. D. L.

*Et Dame M. D. L. C. sa femme, pour-  
suiuant la dissolution de leur ma-  
riage, intimée.*

**S**I le Philosophe Socra-  
tes, & apres luy par in-  
terualle de temps An-  
tonius Iulianus celebre  
orateur Romain, ayans  
à discourir sur le subiet  
des mysteres d'amour, au parauant se voi-  
lerent la face, pour demonstrier la honte  
secrete qui nous saisit, quand il est que-

stion de descouurir la pudeur de nature.

L'appellant issu d'une illustre maison, & comme nourri aux bonnes mœurs, craignant d'offenser sur un traicté peu chaste vos plus chastes oreilles, desireroit volontiers de pouuoir pratiquer ce trait en vostre endroit *vel damno causæ potius quam verecundiæ*, comme disoit Seneque: N'estoit que la femme oubliant tout le respect à luy deu, & reiettant arriere ce qui doit tousiours luire sur le front de son sexe, le force & contraint, à leur honte commune, de reueler ce vergongneux secret de mariage, *quod recte factum sic appetit sciri vt tamen erubescat videri*.

Pour ceste cause il vous supplie de considérer auant toute œuure l'importâce de la charge qui vous est cōmise par le S. siege Apostolique, en la place duquel vous auez à iuger, afin que selon l'aduis du Sage *fidelis vestra legatio partibus ægris sanitas sit*, & qu'il ne se presente occasion de dire comme autresfois par un vieil Romain *nil ex fide aut industriæ agi posse, nisi sub oculis ipsius Pontificis*.

En second lieu de vous serieusement représenter quelle peut estre la conse-

quence de la rupture de ce grand & my-  
stique Sacrement de l'Eglise que Dieu a  
daigné instituer dans le Paradis terrestre  
& en l'estat d'innocence, au lieu que tous  
les autres n'ont esté ordōnez qu'à la suite  
du crime de nos premiers peres, & apres  
leur peché: Et encores quand il s'agit de  
le dissouldre à l'appetit de ce miserable  
sexe, qui trāsporté de vaines ialousies ne  
se bande iamais que cōtre son bon-heur,  
bref auquel on ne peut de si court indul-  
ger

*Quin vaga profiliat frenis natura remotis.*

En l'année 1595. fut traité & celebré  
le mariage des parties, sous tels auspices  
que le plus fauorable Thalassion pour-  
roit desirer. Voires que si la liberté Fescé-  
nine permet de parler honnestement de  
la consommation d'iceluy, la nuit estant  
venue

*Hic nuptam petit illa virum, coiere reducta  
Corpora, certa vterum pariter sulcauit arundo,  
Et pariter fixis hæserunt tela medullis.*

Tellement que soit par gaillardise nu-  
ptiale ou curiosité venant d'ailleurs-*quid  
non Venus anxia curat?* quelques dames pro-  
ches parentes de l'espouse auroient eu la

veüe du linceul tesmoin du congrez absolu, dont est faicte mention au 22. du Deuteron.

Ainsi se passent deux années ou environ que lescdites parties ayans vescu en bonne paix & vnion, se rendans mutuellement l'vn à l'autre la debte coniugale:

*Sacra thori coitusq; nouos thalamosq; recētes,  
Primāque dilecti repetentes fœdera lecti.*

en fin comme l'esprit de la femme, pour son imbecilité se rend aisément susceptible d'impressions sinistres, seroit aduenü que ladite intimee auroit pris vne imaginatiō friuole qui estoit à craindre pour elle, *ne iura iugalia coniux non bene seruasset.*

Et sur ceste deffiance ou ialousie n'auroit fait consciēce de prendre l'effor chez ses parēs, qui au lieu de la renuoyer à son mary, auquel par la loy diuine elle deuoit adherer, comme ayant esté faite la chair de sa chair, & les os de ses os, au contraire l'auroient iniustement retenuë & stimulée à ceste poursuite de dissolutiō du mariage de son espoux & d'elle, fondée sur la pretendue impuissance d'iceluy, & autres faits purs fabuleux, qu'il luy eust esté plus honnesté de taire, *quam protinus vrbi.*

*Pandere res alta syluâ & caligine mersas.*

Toutesfois le malheur auroit voulu pour ledit sieur appellant, que comme la corruption du siecle a donné le cours libre à telles procédures *-dedit hanc contagio labem, & dabit in plures*, au lieu qu'en douze cens ans que la pudeur auroit possédé l'ame, & couuert le visage des matrones de France, à peine se seroit-il autant meue de procès en telles matieres qu'ils font aujourd'huy frequens & iournaliers.

Ainsi au lieu d'admonester de prim' abord, tant par l'Official de Sens, premier iuge, que Messieurs les deleguez de la primace de Lion, & semondre la femme dudit appellant de ce qui estoit de son deuoir, de son honneur, & du respect de sa qualité, ils luy auroient, pour le port & faueur trouué en leur endroit, presté l'oreille si propice, & tellement rebuté l'appellant son mary, qu'il se peut dire auoir ouy le coup de tonnerre apres la veuë de l'esclair, qui se donne deuant, c'est à dire, auoir souffert condamnation auant la preuue, bien qu'elle suiue apres par l'ordre de iustice.

Ce qui luy baille subiect de vous sup-

plier en ce dernier conflict, *vbi res ad triarios rediit*, & la cause est reduicte à son dernier ressort, de vouloir aussi meurement deliberer sur icelle, comme le iugement en a esté precipité tant par le premier que seconds iuges, afin que la verité estant pleinement descouuerte, ne l'une ne l'autre des parties ne puisse ou doive auoir regret à quelque euenement qui en puisse arriuer.

Combien que ledit appellant soustienne que tout ce qui est de droict milite de son costé, & qu'il ne se trouuera par le procès cause quelconque apparente ou valable, pour laquelle son mariage avec ladite inthimee ait deu estre déclaré nul, puis que toutes les solemnitez, tant de la police ciuille que du Sacrement de l'Eglise y ont esté entierement gardees. Et que quant à sa pretendue impuissance, dont sadite femme luy fait impropere, plustost à la honte d'elle qu'au detrimement de la vraye verité, c'est vn faux pretexte que quelques mauuais langues luy ont chauffé en teste, pour tascher à les mettre en diuorce: Ces mauuais langues desquelles l'Ecclesiastique dit avec abomination



nation cap. 20. *Illas dispersisse domos de gente in gentem, ciuitates muratas destruxisse, & domos magnatum effodisse.*

Car premierement sa virilité se iustifie par l'aspect de l'habitude de son corps, qui est le plus fort argument que Platon en ses Loix & noz Iurisconsultes anciens eussent en vsage auant Iustinian, pour la recognoissance de la puberté ou virilité des personnes. *Plato lib. II. de legib. Vlpian. in fragm. tit. II. Iustin. S. I. instit. quibus modis tutela finitur.*

Habitude du corps manifeste pour sa virité en ce qu'il porte barbe, par la force & espaisseur de laquelle, comme certains Philosophes du passé *iussi sapientem pascere barbam* souloient tesmoigner leur masse & courageuse austerité, aussi les Euniques & chastrez n'auroient esté en reputation de gent effeminee, sinon pour la raison de Iuuenal, *quod illis genæ molles & desperatio barbæ.*

Ioint que ledit sieur appellant se decouure auoir vne voix masse, forte, & telle que plusieurs des plus robustes & de condition plus virile n'ont pas communément. De sorte que si vn ancien poëte

Latin assureoit pour marque de virilité, cui *vox gallulascit & ramum roborascere*, l'appellant se peut iustement preualoir de ceste presomptiō: adioustees ces autres circonstances de l'habitude de son corps, que les Poëtes n'attribuent qu'aux plus massés & plus vigoureux, *queis duris horrent densissima setis corpora*, & *axillas ut lucus inumbrant*, mais sur tout, & qui ne se peut dire qu'avec preface d'honneur.

*Quibus in indomito constātor inguine nervus.  
Quam noua collibus arbor inhaeret.*

Aussi met-il en faict pour second lieu, qu'estant de ceste habitude de corps il a consommé son mariage avec ladite intimee & *Zonam soluit diu ligatam*: Non par les moyens ridicules qu'elle suppose, mais par l'effort naturel de son sexe, & comme parle Homere

*ἢ θεμὺς ἀνθρώπων πέλδ' ἀνδρῶν ἢ δὲ γυναικῶν  
Πῶπι τε δ' ἐυνῆς ὅπι θεμεδραὶ ἢ δὲ μυγῆναι.*

Qu'ainsi ne soit, ladite Dame intimee ayant subi interrogatoire sur ce faict par deuant l'Official de Sens, ores que de prim'abord elle l'ait voulu opiniatrement desnier: Toutesfois pressée en fin de la force de verité prodente dixit conscien-

*tia feci*, hors-mis qu'elle auroit tasché d'y apporter du desguisement, & vouloir faire accroire, *idem digitum quod caudam posse salacem.*

Et toutesfois, d'autant que la visite ordinaire en tel cas pouuoit leuer tout ce doute, & que pour ceste cause ledit sieur appellant l'auroit instamment requise, iamais par la resistance de sa femme il n'auroit sçeu y paruenir, bien que l'on ne deust faire plus de difficulté de luy reueler sa pudeur, qu'elle auoit eu de hardiesse (pour ne rien dire de pis) à reueler celle de son mari. Car c'est vne talion d'equité reciproque, & comme dit Phocylide

ὅτι παθὴ τὸ καὶ ἐρεξέει καὶ τ' ἰθεὺς γένοιτο.

Adiousté, que pour comble de toute preuue & la plus frequente qui se puisse pratiquer à ceste occurrence, ledit Sieur appellant se seroit offert au cōgrez, pour demonstrier à l'espreuue qu'il auoit d'arrection, intromission & eiaculation à luy controuersee, & partant que toutes ces circonstances concurrentes, n'y auoit lieu de dissoudre son mariage du chef de sa pretendue impuissance.

--- nondum tibi bella videtur

*Hoc satis, exspectas nunquid & ut parias?*

Ne faisant rien au contraire, ce que la-dite Dame inthimée auroit posé pour prétendu fondemēt de sa cause, que puis que ledit Sieur appellāt auroit recogneu & demeure encores d'accord, n'auoir aucuns testicules ou dajntiers apparens exterieurement dans le Scrotum leur siege ou bource ordinaire : Telles preuues eussent esté & seroient encores à present superflues, pour la consequence qu'elle en tire, que les testicules sont les vrais tesmoins de la virilité, & que sans iceux ne se peüent naturellemēt accomplir les œuures du mariage.

Car la responce à ceste obiection, est: Que si la loy diuine defend à la femme de ne ietter les yeux ou les mains petulantés aux parties où la honte de son mary se cache, à moindre raison doit-il estre permis à l'inthimée de diuulguer qu'elle ait ce ressentimēt de celles de son espoux, *Non enim* (disoit Quintilian) *societate coniugali omnia adeo miscentur, ut animus non habeat aliquod secretum.*

En second lieu, que presuppposé qu'il

n'ait les deux glandes surnommees temoins de virilité pour apparentes, cela n'empesche pas qu'il n'en ait d'occultes, veu tant d'autres parties cachees au corps humain, que pour n'apparoistre pas nous ne doutons neantmoins y estre, Notamment nostre Ame qui est la vraye endelechie des parties vitales, toutesfois comme disoit Cyrus dās Xenophon, ne laisse de produire ses effects dans nostre corps, ores qu'elle n'y soit ny veue ny maniee.

Ioinct que selon le discours des chapitres 26. & 28, de l'histoire de Iob, Nature a caché tant soubz mer que soubz terre, vne infinité de choses rares & precieuses, que pour cela nous ne deuons douter y estre, par la raison qu'en deduit bien amplement Lucrece, au liure premier de ses naturelles,

*Corporibus cæcis quoniam natura gerit res,  
Vt nequeant oculis rerum primordia cerni*

— ac corpora multa necesse est,

*Confiteare esse in rebus nec posse videri.*

C'est pourquoy par tout l'Edict Edilicien nous voyons que nos Iuriconsultes mettēt en pareille categorie les vices apparents ou latens, & par argument con-

traire les perfections latētes ou apparen-  
tes: Mesmes qu'en matiere d'interests la  
loy fait autant d'estat de la bonté intrin-  
seque qu'extrinseque, attendu que par  
l'intelligēce de l'esprit elle peut receuoir  
pareille estimation, *l. cum quid. ff. de rebus  
credit is. l. bonitatis. ff. de euiēt. l. vnica. C. de ve-  
teris numismat. potest. lib. 11. tit. 10.*

Consideré d'ailleurs que supposé que  
ledit sieur appellant n'ait les deux glan-  
dules appellees tesmoins de virilité ma-  
nifestes & apparentes. Cela n'empesche  
que la substance de verité n'y soit inte-  
rieure, d'autant que les choses peuuent  
estre de soy veritables ou faulses sans tes-  
moins, *Misera hercle cōditio mortalitatis quā-  
do iam omnibus quæ inter nos geruntur testem  
adhiberi oportet, ita parum facit veritas.* Et là  
maxime de droict tient que pourueu que  
la verité subsiste de soy l'affirmation ou  
denegation de ceux qui en parlēt ne peut  
en rien alterer la substāce d'icelle. *l. assum-  
ptio. ff. ad municipales. l. si forte. ff. de castr. pecul.*  
Adiousté que sans lesdits tesmoins ap-  
parens ledit sieur appellant en a d'autres  
qui n'ont moindre efficace pour la preu-  
ue de sa virilité, comme ceux qui ont esté

prétouchez de l'habitude de son corps,  
& sur tout de son plumetif en bonne forme, car la loy dit que telle piece authentique est de pareille force que les tefmoins pour bien fournir vne productiō.

Bref comme Pausanias ne fut moins bien conuaincu de la trahison de la Grece, pour auoir esté les tefmoins cachez dessous vne voute du temple de Iuno *Chalcæcos* & que la rebellion d'un grand seigneur de France ne fut moins bien verifiée par le Roy Loys XI. pour auoir seulement esté entendue de quelques tefmoins cachez derriere vne tapisserie par son commandement, que s'ils eussent esté manifestes & apparens.

Au cas pareil ne doit rien deperir à la verité de l'estat viril dudit sieur appellant ce qui luy est obiecté du defaut de l'apparence de ses tefmoins, pource qu'il les a cachez dans le corps, attendu qu'il n'auroit onc souffert aucune excision, & que supposé que la constitution commune de nature soit au contraire, toutesfois

*Nil prohibet raris nomen inesse meum.*

Outre que les constitutions ciuiles & canoniques ne disposent moins des cas

rare & extraordinaires que de ceux qui arriuent le plus communement l. *sed & si. §. si pater. famil. ff. de Iudic. l. antiqui. ff. & pars heredit. pecat. can. in Canonicis dist. 19. can. apostolica can. cenamonensem dist. 56.* notamment les textes qui parlét des Eunuques & Spadons sont fort frequens és liures de l'un & l'autre droict.

Aussi n'est-ce le premier priuilege que s'attribue nature en la varieté de tout ce qui vient en estre, d'où Pline a pris subiet de dire en son histoire naturelle, lib. II. cap. 3. *Mihi contuenti se persuasit rerum natura, nihil incredibile existimare de ea et singula quidem quæ facit in dies et horas quis enumerare valeat? cæterum eius potentia approbat, nihil ab ea sine aliqua occultiore causa gigni, lib. 22. in prefatione ibidem.*

Toute la difficulté donc du procès semble retomber sur ce seul point, de sçauoir si celuy qui n'a point de testicules apparens est incapable de cōtracter mariage, s'il est inhabile ou impuissant à la generation *quasi funerata illa parte corporis qua Hercules esse debuit* pour vser des termes de Petronius, & si en consequence de ce, le mariage contracté avec luy peut estre



estre declaré nul & comme non aduënu.

Or d'autant que la resolution de ceste difficulté depend principalement de la cognoissance des maximes de la philosophie naturelle & de la medecine, pource qu'estant vne fois decidé si le Spadon n'ayant testicules apparens peut engendrer ou non: La question de droict est fort facile par apres à resoudre.

Pour ceste cause ledit sieur appellant pretend vous monstrier qu'en termes de Physique & de medecine, celuy qui n'a testicules apparens est capable de la generation, & de là colligera qu'en termes de Theologie, de Iurisprudence, & de droict Canon, ensemble de Philosophie morale, le mariage contracté avec luy est bon, vallable & legitime, consequemmet ne peut estre postérieurement resolu.

A commencer donc l'ouuerture de ceste question par la Philosophie naturelle, quelle autorité peut estre de plus grand poids sur le subiect d'icelle que de ce grand & incomparable Philosophe, qui pour sa parfaicte cognoissance des choses plus secretes a merité d'estre surnommé le Genie de Nature?

Cet Aristote donc traictant expressement la presente question au liure premier de la generation des animaux, chap. 4. dit, que nature a mis les testicules aux vns par dedans, aux autres par dehors selon la durezza ou mollesse du cuir & de la peau : d'autant que si les testicules auoient vn couuercle trop dur ils deuiendroient inutiles, à cause que le sperme en seroit endommagé: s'ils l'auoient trop mol, ils en pourroient estre refroidis, & consequemment rendroient le sperme non generatif.

Pour ceste consideration, dit-il, audit chap. & au 12. subsequēt, la plus-part des Oiseaux, des Poissons & autres animaux qui n'ont point de testicules, ou les ont renfermez dans le corps, sont les plus prompts & plus chauds au coit: D'autant que tant s'en faut que le manquement des testicules empesche la generation, qu'au contraire les testicules seruent cōme d'un meandre, comme d'une bonde, ou comme d'une porte pleine de tours & destours sinueux pour retarder le cours de la semence, la tenir en branle & en suspens, bref pour luy seruir de contrepoids

ainsi que la pierre est pendue à la trame d'un Tisserand, pour donner cours egal & plus commode à la nauette qui court & recourt dessus.

Le mesme Aristote adiouste aux deux chapitres prealleguez, & autres subsequents au mesme liure, que les testicules font seulement ce bien à l'homme que d'ameliorer aucunement ladite semence ainsi par eux tenue en arrest, & que pour ceste cause ils se recrespent & moutonnent, bref se reuersent dans le corps sur le point de l'acte du coit, de peur d'estre refroidis par l'air exterieur, & pour se reschauffer d'auantage au dedans.

D'où l'on peut colliger, que tant s'en faut que celuy qui n'a aucuns testicules apparens (n'ayant toutesfois souffert aucune excision comme l'appellant) soit inhabile, froid ou impuissant à la generation, qu'au contraire il y est plus vif, plus prompt & plus chaud que les autres, & à l'eiaculation plus soudaine que s'il auoit des testicules, d'autant qu'ils ne seruent que de barre pour retarder le cours de la semence.

Cela est si veritable que le mesme Ari-

store allegue audit chapitre 4. comme chose aduenue de son temps, qu'un Taur-  
reau incontînēt apres son excision ayant  
faillly sur vne Vache, l'emplit toutesfois  
de Sperme generatif, pource que les con-  
duits d'iceluy n'estoient encores retirez:  
Ce qui demonstre qu'à plus forte raison  
vn homme sans testicules apparents, ne  
laisse d'auoir l'eiaculatiō du sperme, veu  
que mesmes vn chastré long temps apres  
sa puberté acquise, ne laisse d'auoir ceste  
faculté iusques à ce que les conduits luy  
soient retraicts & les vaisseaux tant pre-  
parans que deferans bouchéz.

Voila donc pource qui est de la philo-  
sophie naturelle, & ne faut pas douter  
que l'escole des Medecins qui a iuré aux  
paroles & opinions de ce grand Philoso-  
phe, ne s'accorde en cela totalémēt avec  
la doctrine de son Maistre.

Or pour le monstrier par l'anatomie  
des vaisseaux seruans à l'arrection, intro-  
mission & eiaculatiō du sperme, qui sont  
les trois parties requises pour la consom-  
mation du mariage, nous trouuerōs que  
les testicules ne font nulle fonction en-  
tre icelles.

Car quant à l'arrection, les Anatomistes tiennent que le membre viril a plusieurs ligaments spongieux presque semblables à la substance de la ratte, où se trouvent plusieurs ramifications & entrelacements de plusieurs petites veines, artères, & filamens nerveux contre la nature des autres, contenant gros sang & noir, lequel assiégué de l'esprit de concupiscence, & agité par le feu d'amour illec enuoyé, enfle & leue la corne à ce brusque Priape.

L'intromission procede outre les causes que dessus, des ventosités pleines d'esprits vitaux qui tressaillent du cœur, ensemble de la chaleur de concupiscence, & appetit naturel, lequel prend sa source du foye & des reins, & de là s'espend par les parties genitales.

A l'esgard de l'eiaculation, elle prouient nō pas des testicules au moins purement & simplement, ains des vaisseaux spermatiques qui sont fix en nōbre, quatre preparans & deux eiaculatoires où deferās: quant aux preparās depuis qu'ils sortent hors de la grande capacité de la tunique appelée peritoine, ils se reflexchissent en plusieurs replis & anfractu-

sitez en forme de varices, afin qu'en si lōg chemin la matiere de la semēce qui n'est encōres que sang, soit preparee à concoction ou plustost cūicte en iceux par si longue demeure.

Entant que touche les deux eiaculatoires, ils procedent des parastates variqueux ou veines assistantes aux testicules desquels elles font vne substāce separee, & seulement sont entortillees sur iceux, ou coulent dessus comme vne corde autour de sa poulic, puis se rencōtrans avec les preparans, montent par leurs voyes dans le ventre, sans que les testicules leur seruēt d'autre chose que de cōtre-poids qui balance le flux de l'eiaculation.

Dont resulte qu'il n'importe en quel endroit soient les testicules ou dans l'interieur à l'enuiron de l'os pubis, ou bien dans le scrotum; ains au contraire, que quand ils sont dans l'interieur, l'acte de la generation en est plus vistement parfait, pource que les vases preparans & eiaculatoires n'ont point tant à descendre & remonter comme quand les testicules sont dans scrotū en partie plus basse & subiecte à vne intempērie exterieure.

Car veu que la proportion du corps humain est admirable en toutes ses parties, ne faut point douter que quand les testicules ne sont descendus iusques au scrotum, pource que les veines cremasteres auxquelles ils sont pendus sont trop courtes, que les veines parastrates dont procedent les vaisseaux eiacularoires ne soiēt aussi proportionnez de mesme, comme on void au corps de la femme ou les vaisseaux spermatiques sont à la proportiō des veines cremasteres, auxquelles sont pendus leurs testicules en l'interieur de la matrice, & pourtant ne se voient pas, d'autant qu'ils sont pendus plus court que ceux du commun des hommes.

Tout ce que dessus donc recueilli des liures des Medecins & Anatomistes plus excellens, tant anciens que modernes, demonstre qu'un homme non chastré ne exsequé, & qui routesfois n'a aucuns testicules apparens, est autant ou plus capable de la generation que ceux qui les ont apparens, d'autant qu'à ces derniers, le testicule pendant est comme le frein ou la bride de leur appetit charnel dont

44

les autres sont affranchis pour ce qu'ils ont la carrière libre pour faire vn cours plus chaud & violent.

En second lieu resulte des moyens que dessus, que les testicules sont si petit office à la generation que par maniere de dire ils seruēt plus d'archers pour faire la garde à la porte des vaisseaux spermatiques, à fin d'empescher qu'ils ne se iettēt à la foule, que non pas qu'ils facent aucun ministere notable en l'acte Venerien qui a tant d'autres parties & anfractuositéz pour faire cuire & digérer la semence: Tant y a que sans iceux se peut faire l'arrection, l'intromission, & ne seruent que si peu que rien à l'eiaculation, partant le defaut d'apparence d'iceux ny ne peut empescher vn mariage d'estre contracté, ny contracté, ne le peut dissoudre.

C'est ce qu'il eschet maintenant de discourir par les raisons tirees de la Theologie, Iurisprudence, droict Canon & Philosophie morale.

Quand à la Theologie si nous voulōs commencer dès l'institution du mariage aicte de l'autorité de Dieu, & en l'estat d'inno-



d'innocence de nos premiers peres: Des lors fut prononcé que la seule mort de l'un ou l'autre des conioincts les pouuoit deliurer du ioug du mariage.

Et comme si Dieu preuoyant l'inclination naturelle du futur sexe féminin à ce qui feroit de l'œuvre de la generation, luy eust voulu imposer ce ioug de n'exiger du mary la debte coniugale, *nisi quatenus facere posset* comme parlent les Iurifconsultes, il auroit apres le peché prononcé cōtre les femmes, en la personne d'Eue ceste effroyable & irreuoquee sentence *אש תשוקתו אלהיך Erit concupiscentia tua ad desiderium viri tui cap. 3. gen.*

Vray est qu'en cet endroit le texte vulgaire de la Bible lit *erit subiecta viro & ipse dominabitur tui*, qui reuiert aucunemēt à l'autre, mais la version literale au pied du texte Hebraique est plus significatiue pour demonstrier que la concupiscence de la femme doit estre bridee au vouloir & pouuoir de son mary, attendu qu'il est chef d'elle, qu'il est cōme dit Medee dans Euripide *δὲ σώματος τοῦ σώματος*, qu'il a son corps en sa disposition & non elle reciproquement, comme naturellement le

subiect est inferieur en pouuoir que son seigneur & maistre.

Que si nous lisons le diuorce permis aux Iuifs par le 24. du Deuteronomie, & chap. 6. de Iosephe au 4. de ses Antiquitez, nous le deuons prendre comme permis & indulgé pour la durezza du cœur de ce peuple, non comme approuué, ainsi que nostre Seigneur nous l'auroit enseigné de sa bouche dans S. Matthieu chap. 19. S. Marc, 10. & S. Luc, chapitre 16. S. Paul en la premiere aux Corinthiës chap. 7. & ailleurs.

Et encores ne trouuerons nous point, qu'en toute ladicte ancienne Loy, se soit faite aucune dissolution pour cause de pretendue impuissance de mary ou sterilité de sa femme, ains au contraire les mariez reduits en ce malheur, auoient recours aux prieres & œuures de penitence, recognoissans que tel defect de lignee procedoit de l'ire & maledictiõ de Dieu, *Deuteron. 7. Reg. 1. cap. 1. Psalm. 117. Lucæ cap. 1.* Philon le Iuif au traicté des loyers & des peines du peuple Iudaique.

Que si de ce pas nous descendons à la loy de l'Euāgile, ce point nous y demeu-

rera pour constant & arresté , qu'il n'y a nulle cause en icelle , pour raison de laquelle ce grand & ineffable Sacrement en nostre seigneur IesusChrist & son Eglise puisse estre dissolu. *Pau. ad Ephe. cap. 5.*

Car ce qui est dit és passages de S. Matthieu, S. Marc, & S. Luc préalliguez, que l'homme peut reietter sa femme pour cause de fornication, cela s'entend de la seule separation du liét, comme l'ont entendu S. Paul au passage précotté, S. Ierosme *in epitaphio Fabiola.* S. Ambroise *ad Rom. cap. 7.* S. Augustin liure de *nuptiis & cōcupiscentia*, & comme l'a decidé tant le Concile Mileuitain can. 17. que le dernier Oecumenique tenu à Trente Sess. 24. can. 7. & non que pour ceste separation du liét, le Sacremēt du mariage soit du tout resolu.

Ains au contraire telle & si grande est la force de ce lien, que mesmes encores que les conioincts des-mariez soiēt conuolez en de secondes nopces, toutesfois selon l'autorité de S. Augustin *potius inter se coniuges sunt etiam separati quam inter alios quibuscum adhæserunt.* Tellement que s'il appert par apres que sur fausses preuves, ou precipitamment le premier ma-

riage ait esté annullé , force est aux premiers conioincts, à peine de crime de conscience, de retourner ensemble, pource que tout ainsi que l'ame apostasiée de la foy ne perd le sacrement d'icelle, ny aussi les conioincts separez l'un de l'autre. *Lombardus distin. 31. 4. senten. can. requisuisti 33. quest. 1. can. vsque adeo. 32. quest. 7.*

Mais ce qui semble de plus admirable sur ce subiet est , que ce sacré ioug dure mesmes apres la mort, comme nous pouuons recueillir de la question faicte à nostre Seigneur par les Sadduceens de la femme des sept freres, sçauoir auquel d'iceux luy faudroit se reioindre au iour de la future resurrection. Et pour ceste cause par tous les Royaumes & Republiques mieux policees les vefues apres le trespas de leurs maris, iouyssent des mesmes hōneurs, priuileges, preeminences, & prerogatiues, que fils viuoient encores, pource que par leur decés ce nœud gordien, ceste chaine aimantine, & ce lien si ferme n'est reputé rompu. *l. filij §. vidua ff. ad municipal. §. non tantum auth. de nupt.*

Et tant s'en faut que ladite Loy Evangelique repete les hommes en qui les or-

chies n'apparoissent, pour incapables de ce grand Sacrement du mariage, Qu'au contraire il ne nous est rien chanté plus souuent que cet oracle salutaire, *Qui habent vxores, sint tanquam non nubentes.*

Comme si nostre Seigneur, & apres luy S. Paul, vouloit dire, qu'en l'ancienne Loy la generation estoit tres-necessaire, tant pour la multiplication du Monde, qu'aussi pource qu'il falloit que par continuatation du sang és familles, le souuerain Messie en prist sa naissance & origine.

Mais auiourd'huy qu'il est venu, que *tempus videtur in collecto*, & qu'il faut remplir le Ciel de vierges, cōme les nopces Iudaiques remplissoient la terre de peuple fecond, telle obligation precise à la generation, n'est plus si necessaire: Non que sur ce pretexte les mariez se doiuent refuser mutuellement la debte coniugale, mais qu'en defaut de lignee ils ne diuorcent pas l'un d'auec l'autre, ains supportent leur imperfection mutuelle, & viuent comme frere & sœur, s'ils ne peuvent viure cōme mary & femme: A quoy se rapporte ce qu'escriit Tertullian *despa-*

donibus voluntariis propter Christum factis.

Que si au contraire ils peuuent viure comme homme & femme, ainsi que l'intimee a recogneu au fait qui s'offre, auoit eu la cohabitation de l'appellant son mary, Ne faut nullement douter que le mariage ne soit prou consommé, ores que la lignee ne s'en soit ensuiuie si tost : Car il ne peut estre vn plus parfaict mariage que celuy de Iesus Christ avec son Eglise, & neantmoins, comme dit Arnulphus Euesque de Lizieux, qui florissoit y a quatre cens tant d'annees, en son Sermon *in Synodo*, la consommation ne s'en fera qu'en l'autre siecle, lors qu'il sera dit, *Media nocte clamor factus est, ecce sponsus venit.*

Bref pour conclurre ce point de Theologie, *Domin. de Soto* sur le 4. des sentences distinct. 34. quest. 1. articulo 2. *Siluester Ver. matrimonium.* 8. §. 16. & *Petrus Paludanus* grand Theologien s'accordant avec eux decident que celuy qui n'a aucuns testicules apparens, pourueu qu'il ne soit chastré ne exsequé, doit estre censé capable du mariage, pource qu'il a la vertu & faculté generatiue actuellement, ores que non paraenture effectuellement, car ce

31

ne peut estre qu'un vice accidentaire de sterilité, pour lequel ne se peut ny doit dissoudre un mariage - *can. non enim 32. quest. 1. can. non solet. 32. quest. 4. can. plt. & seq. 32. quest. 7.*

Veue mesmes que S. Thomas passant plus outre tient que l'acte du coit n'est point de l'essence du mariage ains seulement la puissance au coit, qui faict qu'en contractant mariage ny a point eu d'erreur de la femme en la croyance de l'habillité de l'homme aux œuvres d'iceluy, en consequence dequoy ne peut il posterieurement estre resolu pour ce qu'il a subsisté des le commencement. *D. Thomas, 3. parte summa quest. 58. arti. 10.*

L'opinion duquel ensemble dudit Soto au passage preallegué, semble estre fondée sur la glose du Canon *hi qui 32. quest. 7.* qui decide que si *Spado habet virgam arrectam siue resoluat sperma, siue nō, quod sit ibi matrimonium, nam talis satisfacit mulieri, sicut mulier satisfacit viro siue resoluat siue non, nec semper requiritur quod in matrimonio sit filiorum procreatio, quia sufficit quod non euitent prolem, can. solet. 32. quest. 2.*

Et en cela comme toutes les sciences

ont une mutuelle correspondance & affinité entre elles, aussi la Iurisprudēce de laquelle maintenāt eschet parler symbolique & s'accorde fort avec la Theologie, quoy que les Iurisconsultes la plus part ayent esté payens: mais le mariage a tousiours esté en tel respect enuers toutes nations, tant policees qu'agrestes & barbares, qu'elles auroyent presque sur le subiect d'iceluy suyui d'un commun accord ce qui est des plus secretes notions de la nature.

Quand le Iurisconsulte demande si le mariage avec le spadon est vallable il distingue comme le Theologien, si cest vn chastré ( car spadon est le nom general comprenant souz soy les Eunuques chastez, Thlibies Thlasies & autres *l, Spadonum. ff. de verb. signific.* ) si dōc c'est vn chastré, le mariage qu'il contracte doit estre censé nul, pource qu'il est reputé pour incapable de la generation-*nec arrigit ipse*  
*Et queritur pariat quod sua Polla nihil?*

Encores que l'Ecriture sainte nous tesmoigne que Putifar Eunuque de Pharaō estort marié pource dit Rabi Kimhi qu'il n'auoit la verge coupee, que Philostrate



10strate parle d'un Eunuque Babylonien surpris sur le fait du coït, & que le Philosophe Phauorinus se soit autres-fois vanté que tout Eunuque qu'il estoit, on le soupçonnoit d'adultere, cōme aussi Cyrillus dans Suidas assure que tels Eunuques prouueu qu'ils ayent esté exsequez sur le tard, retiennent beaucoup de la faculté du coït, & sont fort ardents à l'acte Venerien *ειοθότες ἀσελγαίνειν ἀμέβως καὶ ἀκολασταίνειν ἀναιδῶς καὶ ἀπορέτως.*

Maistant y a que puis que telle est la commune notiō du droict des gens, que ces chastrez sont incapables de la generation, nous tiendrons pour resolu que ce sont ceux que l'un & l'autre sexe a de coustume d'auoir en abomination, sont ceux que les Grecs appellēt demy-hommes demy-femmes, ny hommes ny femmes, sont ceux a qui Dieu deffend l'entree en son temple-*Deuteron. 23.* sont ceux que les constitutions canoniques prohibent d'estre promeus aux sainctes ordres, que les loix ciuiles repoussent & reiettēt des charges publiques.

Sont ceux que les Orientaux confinoient aux cabinets de leurs femmes qui-

*buscum coire non possent*, dit Ammian Marcellin lib. 18. & lesquels pour ceste cause Accurse dit estre propres à garder les Dames subiettes à leur plaisir gloss. l. *sin autem ff. de edilit. edict.* qui par tout ledit tiltre sont appelez mal-sains & vitieux l. 7. *Et all. ff. eodem*, à qui l'Empereur Leon defend le mariage par sa constitution 98. expresse à ce, des nopces desquels Iuuenal & Martial se rient, les comprenant quelques-fois sous le nom general de spadons-*cum tener uxorem durat spado*, bref dont Ouide dit en l'Elegie 3. du 2. de ses amours. (seruas.)

*Hei mihi quod dominam, nec vir, nec foemina*

*Mutua nec Veneris gaudia nosse potes,*

*Qui pueris primus genitalia membra recidit.*

*Vulnera quæ fecit debuit ipse pati.*

Telle espece d'Eunuques ou spadons est sans doute incapable du mariage & de l'œuure de la generation, comme le traite elegamment Theophile au § *ἐκ τὴν κατωρίαν* de adopt. aux Institutes, ce qui les rend aussi incapables de l'adoption *quod naturam imititur* l. 2. ff. de adopt.

Mais quant aux spadons non mutilez ne exsequez, qui neantmoins ne sont nez

qu'avec vn testicule ou avec deux non apparens, toute la Iurisprudence resoult qu'ils sont capables du mariage. *l. si serua. § .i. de iure dotium* qu'ils peuuent adopter *D. l. 2.* qu'ils peuuent faire testament & instituer heritiers, *l. sed est quesitum ff. de liberis & postumis, quoniam nec etas nec sterilitas ei impedimēto est, secus in castratis*, qu'ils peuuent manumettre *matrimonij causa, l. alumnos ff. de manum. vindiēt. secus in castratis*, que tels spadons peuuent estre chargez de tutele, qui est vne fonction virille *l. i. C. de excusat Tuto.* bref qu'ils peuuent tenir rang entre les gēs de guerre, *l. qui cū vno ff. de re milita.* & pourquoy-non combattre sous ces drapeaux à la faueur desquels *Militat omnis amans, & habet sua castra Cupido?*

La raison estant fondee sur ce que dit Theophile au paragraphe preallegué, sçauoir que le spadon non resequé n'a pas vn empeschemēt perpetuel pour la generation, ains temporaire seulement lequel venant à cesser, il peut suffire aux œuures du mariage. τῶ παρῳς ἀπαλλαγέντος ἐν τοῖς γυνικοῖς μορίοις παυδοποιῶσι. Et à ce propos Strabō escrit des Indes qu'ils ont

des Medecins stipēdiez pouraider & medicamenter le vice ou empeschemēt qui peut estre aux persōnes marieez de n'engendrer enfans, Geograp. lib. 15.

Ou bien la raison de ce que le spadon non exsequé peut contracter mariage, procede de ce qu'escriit Accurse en ladite Loy-*si serua* que tel spadon a les facultez genitales, & selon qu'il est chaud plus ou moins a vne semence prolifique, ou s'il ne l'a telle, que c'est vn vice accidentaire de sterilité qui ne peut dissoudre vn mariage.

A cela se conforment les Canons-*can. pen. & sequenti 32. quest. 7.* & autres prealleguez, & d'autant que c'est principalement par les maximes canoniques que se doiuent decider les causes matrimoniales, pour ceste cause entrera l'appellant au discours d'icelles suiuant l'ordre & diuision premise.

La Science canonique qui se guide en tout par sa Cynosure, qui est l'Escripture sainte, tient avec elle que le mariage est vn tres-grād & tres-venerable Sacremēt, auquel l'homme ne doit temerairement mettre la main pour le dissoudre puis

que Dieu l'a conjoint, que ce mariage se  
parfait & accomplit *pactione coniugali, non  
defloratione virginitatis*, comme dit S. Am-  
broise, & selon qu'il est traicté plus au  
lōg *causa 27. quæst. 2. can. matrimonium can.  
sufficiat. can. cum initiatur* & autres, & sur  
cette maxime S. Augustin tient au canon  
*omne, eadem causa*, qu'entre S. Ioseph & la  
vierge Marie *verum fuit matrimonium*,  
ores qu'ils ne soient iamais conuenus en-  
semble pour l'œuvre du mariage.

Les mesmes canons tirez des escrits des  
Saints Peres nous representent que le  
mariage se consomme & accomplit par  
vn bien de trois especes-*spe boni prolis, boni  
fidei, boni sacramenti*, & que ces trois ont esté  
audit mariage de S. Ioseph, & de la vier-  
ge Marie *non ex officio sed ex his quæ comitan-  
tur officium coniugij, quia subsequuta est proles,  
fuit fides & sacramentum can. institutum & se-  
quentibus 27. quæst. 2. Proles*, qui és autres se  
considere par la commixtion des sexes, fi-  
des par la loyauté coniugale respectue-  
ment gardee sans adultere *Sacramentum*  
par la coniōction indiuidue sans diuorce

Finalement nous apprenons desdits  
canons qu'encores que les cōioincts qui

ne peuuent auoir la cohabitation l'un de  
l'autre , puissent toutesfois subsister en  
mariage , & viure comme frere & sœur,  
bref soit dit qu'ils feroient mieux & vi-  
uroient en estat plus parfait à garder con-  
tinence , neantmoins *quia melius est nubere  
quam vri*, que si le mary dés auparauant le  
mariage contracté estoit froid & impuis-  
sant , *ex post facto* la femme a permission  
de faire declarer le mariage nul, mais par  
indulgence seulement , & pour euitier à  
plus grand mal *καὶ συγγνώμην* pour vser  
des termes de S. Paul , *οὐ κατ' ἑπιταγήν* se-  
*cundum veniam non secundum preceptum*.

Car à cet esgard les Theologiens & ca-  
nonistes considerent double institution  
du mariage, la premiere en estat d'inno-  
cence *ex precepto ad multiplicationem prolis*,  
la secōde, apres le peché, *ex remedio, ad vi-  
tationem fornicationis*. d. Lombard. 4. sentent.  
distinct. 30. ce qui semble tiré de S. Augu-  
stin *can. nuptiarum 27. quest. 1.* où il dit que  
*nuptiarum bonum olim fuit Legis obsequium  
nunc est infirmitatis remedium, in aliis humani-  
tatis solatium*.

Tout cela donc presupposé ne fait rien  
pour assister la poursuite faite par l'inthi-

mee contre son mary, pour la dissolution  
de leur mariage:

*Digna minus misero non meliore viro.*

Car il a esté contracté & solēnisé en face de saincte Eglise *sub spe prolis, fidei, & sacramenti*, il a esté consummé soubs ceste esperāce par la commixtion des deux sexes, & par la culture du terroir genital.

*Spes alit agricolas, spes sulcis credit aratis*

*Semina quæ multo fœnore reddat ager.*

Encore que ce ne soit pas simplement ceste conionction des corps qu'il faille cōsiderer en vn mariage, ains plustost la cōionction des deux ames par la vertu du sacremēt, qui au cōtraire plus il est exēpt de la commixtion des œuures de la chair, plus est censé parfait, dit le Maistre des sentences, *lib. 4. distinct. 26.* De maniere que ce brocard vulgaire, *mulierem cum qua non fuit commixtio ad matrimonium non pertinere*, se doit entendre selon l'interpretation d'iceluy, que le mariage ne laisse de subsister avec elle *quantum ad veritatem & sanctitatem coniugij*, & si non *quantum ad plenam significationem vnionis Christi & ecclesiæ.* d. Lombard. *distinct. 30. ex d. Ambrosio lib. 1. de patriarchis.*

Car la commixtion des corps denote bien la figure de l'vnion de IesusChrist & de son Eglise *in naturæ conformitate*, mais sans commixtion le mariage ne laisse pas de la représenter *in charitate*, dict ledict Maistre des Sentences, *lib. 4. d. distinet. 26.* & S. Thomas, 3. *partesummæ quest. 29. artic. 4.* Partant ledit mariage considéré en sa derniere espece, n'en est pas moins valable, *quia plus valet sanctitas sacramenti, quam foecunditas ventris*, dit S. Augustin *lib. de bono coniugali cap. 18. tom. 6.*

Bien est vray que le commun vœu de ceux qui subissent le S. Sacrement de mariage, est d'auoir lignee *vult alter pater esse, altera mater esse*, mais ce vouloir s'entend au cas que Dieu qui dispose des propositions de ses creatures, le vueille ainsi, & non autrement: car l'homme & la femme sont bien l'instrument de la generation, mais c'est Dieu qui par sa benediction produit le fruct en estre, *neque qui plantat, neque qui rigat, sed qui incrementum dat Deus.*

Theodoret au troisieme liure de la prouidence de Dieu dict, qu'elle est principalement admirable en la generation de l'homme, tant par la mutation d'une  
petite



petite semence en tant d'os, de muscles & de veines, que par l'infusion de l'Ame immortelle. Autant en discourt Pisides, au liure de la Cosmourgie.

Le Patriarche Iob adressant sa parole à Dieu recognoist bien que la main d'iceluy auoit plus operé en sa generation que ses pere & mere, *-manus tuæ domine fecerunt me. Pelle & carnibus vestisti me, ossibus & nervis compegisti me, vitam mihi tribuisti.*

Bref pour demõstrer que ce n'est point aux mariez de dire, *Volo pater esse, volo mater esse*, ains que cela se doit remettre à la grace de Dieu, lequel comme dit Iuuenal, tout payen qu'il fust, sçait & cognoist que le plus souuent — *nos animorum.*

*Impulsu & magna cecaque cupidine ducti.*

*Coniugium petimus partumque vxoris, at illi*

*Notum qui pueri qualesque futuri.*

Suffira de conclure ce point par ce passage de S. Augustin au liure 12. chap. 25. de la cité de Dieu — *Deus dat vnicuique seminum proprium corpus, ita nec foeminam sui puerperij creatricem appellare debemus, sed potius illum qui cuidam famulo suo dixit, priusquam te formarem in vtero noui te, & quamuis anima sic vel sic affecta prægnantis valeat aliquibus*

*induere qualitatibus foetum, naturam tamen illam qua gignitur, tam ipsa non fecit, quam nec ipse vir se fecit.*

C'est donc pour demonstrier que le mariage ne laisse pas d'estre vallable, encores que quelque deuoir qu'y apportent l'homme & la femme, Dieu n'y entre-messe sa benediction pour leur bailler lignee, veu que Spartian nous tesmoigne en la vie de l'Empereur Alexandre Seuer & discourt avec admiration que les plus grands personnages de la terre, ou n'ont point eu d'enfans, ou les ont eu si detestables & mal complexionnez, qu'il eust esté plus expedient pour eux de n'en auoir iamais eus *ἡρώων πτήματα τέκνα.*

Et toutesfois qui de tous ceux-là contractant mariage n'eust dit - *volo pater esse?* La mere de Samuel se mariant disoit-elle pas en sa pēsee, *volo mater esse.* La femme du Prophete Zacharie esperoit-elle pas d'estre mere, & tant d'autres, neantmoins elles n'en auroient eu que miraculeusement, & non tant par l'œuure de nature que benediction de Dieu.

Partant disoit bien à propos Rabi ben Syra le plus sage des Hebreux, & lequel

on estime auoir esté nepueu de Ieremie, que l'homme ne doit iamais dire ie veux celà, si premierement il ne dit, prouueu que Dieu le vueille, d'autant (adiouste ce Rabin pour exemple) qu'un marié ayant dit qu'il vouloit coucher avec sa femme, & elle avec luy, à l'instant qu'ils monterent sur la couche, ils trouuerent que *Thalamus eis erat tumulus*, comme Arnulphus Euesque de Lizieux en apporte vn pareil exemple en son Epistre cinquiesme, & Plin liure cinquiesme de ses Epistres, Epistre 16. outre ce qui est vulgaire de Sara femme du ieune Thobie, dont les Hebreux en ont fait ce prouerbe: *L'espousee monte sur la couche, & ne sçait ce qui luy en peut arriuer.*

פלתא אלתח לביבבא ולא יסע מה כימי לה

Et selon cet aduis les cōioints par mariage diront - *volo pater esse, volo mater esse*, pourueu que Dieu benisse leur conionction comme faite chastement, *liberorum procreādorū spe*, & non pour assouir leur concupiscence brutalle que Dieu abhorre & dont il retire sa benediction.

Comme de fait les Historiens ont obserué entre autres marques d'un Estat

corrompu, que depuis que le luxe & l'ex-  
cès d'un trop d'aise, commencent à infe-  
cter cet œuvre de nature en sa source pre-  
miere, & que l'on s'efforce de le prouo-  
quer, plustost par artifice que par ce cō-  
mun instinct dont tousiours la pudeur  
tient & tire la bride, alors ne se produict  
aucun Part que contrefait, monstrueux  
& difforme, ou bien les femmes perdent  
la force de concevoir du tout,

*steriles moriuntur & illis*

*Turgida non prodest condita in pyxide Lede.*

*Nec prodest agili palmas præbere Luperco.*

Tant les conioincts par mariage doi-  
uent apprehēder en ce cas l'indignation  
de Dieu contr'eux, & notammēt la fem-  
me, qui semble auoir le don de fecōdité,  
comme par preciput en son lot & parta-  
ge, afin de seruir de vigne plātuseuse aux  
coings de sa maison: & qui partant doit  
imputer à son malheur le defaut de li-  
gnée, non que sous ce pretexte elle se  
doibue disioindre d'auec celui qui a tous-  
iours fait auec elle sa fonction virile.

Cōsidéré mesmemēt que l'esperāce de  
la procreation, n'est pas la cause efficien-  
te ne finale du mariage, *nec in coniunctione*

*maris & fœminæ consistit veritas matrimonij*  
*can. non enim 32. quest. 1. can. solet. quæri 32.*  
*quest. 4. d. Lombard. 7. distin. 30. Ce ne peut*  
*donc estre qu'une cause impulsue, qui*  
*cessante non cessat effectus l. imperialis. S. sed &*  
*si tales C. de nuptiis l. si mulier dotem. C. de iure*  
*dotium.*

C'est à dire que le mariage a esté intro-  
 duit pour refrener les vagues concupiscen-  
 ces des hommes. - *fuit hæc sapiëntia quondam*

*Concubitu prohibere vago dare iura maritis,*  
 pour les diuertir de la Pederastie ou a-  
 mour des masles, bref pour leur appren-  
 dre que s'ils vouloiënt rechercher le plai-  
 sir charnel ils le deuroiënt rechercher par  
 la conionction legitime, & y estre pouf-  
 sez à ceste fin pour auoir lignee, ainsi  
 qu'il est remarqué au 8. chapitre de Tho-  
 bie, & au 4. d'Esdras, chap. 18.

Mais de là ne s'ensuit pas qu'en défaut  
 de lignee cause impulsue du mariage il  
 puisse estre dissolu, car mesmes iamaïs  
 entre les payens on ne trouua bon à Ro-  
 me le diuorce de - *Sp. Carbilus Ruga*, à cau-  
 se de la sterilité de sa femme, & iacoit  
 qu'il iurast qu'il se vouloit marier avec  
 vne autre - *liberorum procreandorum causa.*

Car si vous admettiez ceste ouuerture faudroit dire que le mariage pourroit estre dissolu non seulement en defect d'enfans, mais aussi au cas qu'ils ne surueussent : car tel est le commun vœu des peres & meres, non seulement d'auoir enfans, mais aussi de les auoir suruiuâs pour reuiure par eux en la posterité-*Vnde & superstitiosi dicti sunt* au dire de Ciceron *quod soleant rogare deos, vt habeant liberos superstites*. Tellement qu'à ce compte la dissolution des mariages iroit en vne infinité, si on ne faisoit marché avec Dieu à telles, ou telles conditions.

Et qui plus est, faudroit entrer en ceste absurde opinion que les mariages contractez entre personnes valetudinaires & vieilles d'aage comme de soixante ans & plus, seroient nuls-*ab initio* par defect de puissance de procreer lignee, & toutes-fois tels mariages se contractent iournellement en l'Eglise, & n'y sont point reprouuez, selon la doctrine de S. Thomas 3. *partē summę quęst. 58. art. 10. num. 3.*

Voire que l'Empereur auroit pour ceste cause aboly la loy Papiene & Popienne qui imposoit la boucle aux sexagenai-

res & leur defendoit le mariage l. *fancimus*.  
*penul. C. de nuptijs.*

Car la procreation n'est pas principalement la cause du mariage. La femme fut premierement créée pour l'ayde & support mutuel de l'homme, d'où Platon a tiré son Androgyne, & les Poëtes leurs Molionides aux membres entrelassez. Les maladies & autres afflictions qui trauersent nostre vie nous ont fait recourir à la necessaire conionction du mariage, dict Clement Alexandrin au 3. de ses Stromates.

Valerius Messalinus disoit au 13. des Annales de Tacite *vxoris nullum aliud leuamentum esse, quam consortium rerum secundarum*, Columelle lib. 12. chap. 1. *Matrimonium ideo institutum esse scripsit, vt ex hac societate mortalibus adiutoria senectutis, nec minus propugnacula præparentur*, & au mesme propos Quintilian *declamat. 368. sic matrimonia iunguntur vt imbecillior sexus præsidium ex mutua societate sumat.*

Et partant qui diroit vn mariage n'auoir autre but que la procreation de la lignee sous l'esperance de laquelle il auroit esté contracté, & qu'au defaut d'icel-

le (non par le defaut du mary) le mariage seroit nul, pecheroit contre les reigles de nature.

Veux mesmes que le mariage ne se cōtracte pas seulement *sub spe boni prolis*, mais aussi *sub spe boni fidei*, & *boni sacramenti*, or tout ainsi que - *si desit bonum fidei*, c'est à dire que la femme oubliant sa loyauté coniugale vienne à commettre adultere, le mariage n'en est pas nul pour cela, cōme pareillement - *si desit bonum sacramenti*, c'est à dire au cas que la femme diuorce d'auec son mary, d'autant que l'on espere tousiours mieùx, Mais les esperances humaines sont tromperesses & - *nesciamus hominum fati sortisque futura*.

Ainsi au cas que les mariez soient deçus de l'esperance *boni prolis* le mariage n'en sera pas nul pour cela - *quia ad veritatem copulatiuorum requiritur vtrumque copulatum esse verum l. si heredi. ff. de condit. instit. l. ad testium. §. si quis. ff. qui testam. facere possunt*, & l'argumēt à *coniunctis ad diuisa* & à *diuisis ad coniuncta* est vallable en termes de Philosophie, & de Theologie d. Lombard. 4. sent. distint. 31.

Tellement que de tout ce discours sera tirée



tiree ceste conclusion, que par les maximes canoniques n'y a cause quelconque de pouuoir - *summo iure* dissoudre vn mariage, & que ce qui a esté adiousté de la frigidité ou impuissance du mary n'est - *ex præcepto, sed ex mera indulgētia*, pour euitter à vn plus grand mal : or comme dict Tertullian - *quod mere bonum est non permittitur, sed vltro licet, quale enim bonum intelligendum est quod dicitur melius poena?*

Ce qui sert à demonstrier qu'en telles causes qui ne sont que de pure indulgence ne faut pas encores, comme disoit Caton dans Tite Liue, relascher la bride *animali impotenti & indomito*, pource que selō l'aduis de Seneque à ce sexe - *id facere laus est quod decet, nō quod licet*. Et supposé que les loix le permettēt, *Tu-ne quod crudelissimum habent iura statim occupas?* c'est donc ce qui requiert d'y apporter toutes les precautions requises, & voir si la femme a vne plaincte si iuste que pour icelle se doiue dissoudre vn tel sacrement.

- L'appellant met en fait qu'il a consommé son mariage avec sa femme, qu'il est puissant d'engendrer, qu'il a l'arrection, l'intromission & eiaculation, bref qu'il a

defloré l'inthimee, cōme apres plusieurs  
feintes elle en est demeuree d'accord, ils  
n'ont habité que deux ans ensemble ou  
enuiron, Le *ἐγγυον* ou amitié coniuga-  
le vient, dit Plutarque, *ὑπὸ τῷ ἐγγυον*  
de la longue demeure des conioincts,  
néatmoins la femme, sans sevice & mau-  
uais traictement, se seroit retiree d'auec  
luy, est-ce là-*bonum fidei*, *bonumque sacra-*  
*menti*, qu'il esperoit d'elle, comme elle es-  
peroit de luy-*bonum prolis*?

Le deuoir des mariez est reciproque, &  
puis que le chapitre *laudabilem* è pre-  
script vn espace de trois ans, à cause de la  
vertu du nombre ternaire, pour descou-  
rir par la femme la puissance ou im-  
puissance de son mary, pourquoy est-ce  
que ladite inthimee a preueni ce temps,  
& n'a eu la patience de l'attendre? Car  
mesmes Columelle dit qu'il faut quatre  
ans pour esprouer la fertilité ou sterili-  
té d'une vigne *est enim sui iuris natura, nec*  
*semper ad libitum respondet, imò dilata foecun-*  
*ditas quandoque pleniores fructus reddit:* qu'  
ainsi ne soit, combien void-on de per-  
sonnes qui apres auoir esté longuement  
mariees sans auoir enfans, en fin en au-

roient en grande multitude?

L'appellant donc propose à l'inthimée pour fin de non receuoir - *Nimum prope-  
ras & adhuc tua messis in herba est. Non est hoc  
tempus actionis istius*, faut que les trois ans  
s'escoulent.

-- *Multa ferūt anni veniētes cōmoda secum*,  
peut estre que le ternaire accomply ren-  
dra seconde celle-là qui se soustrayant de  
son mary empesche elle mesme. - *Ne possit  
parere, & partu retinere maritum.*

Et d'insister par elle que ceste patience  
triennale seroit frustratoire, puis que le-  
dit sieur appellant n'ayant point de testi-  
cules apparens, donne vn preiugé contre  
luy qu'il soit impuissant à la generation.

-- *clamet melicerta perisse, frontem de rebus.*

Car il a esté monstéré cy dessus que tel  
preiugé est du tout fallacieux, d'autant  
que l'homme qui n'a point de testicules  
apparens, les peut auoir au dedans selon  
l'opinion d'Aristote suiui des Medec-  
ins, & d'abondant qu'un spadon non  
chasté ne exsequé peut arriger, intro-  
mettre & eiaculer, bref faire toutes fon-  
ctions genitales sans l'aide des testicules,  
qui n'y sont que fort peu ou point neces-  
saires.

Consideré d'ailleurs que ledit Sieur appellant a d'autres tesmoins fort apparens de sa virilité, comme la voix forte, la barbe espaisse, & le poil frequent aux parties inferieures, tous signes de virilité parfaite, & de faculté generatiue, selon Aristote *lib. 3. de l'histoire des Animaux, chap. 11. lib. 5. cap. 7.* & au quatriesme de ses Problemes *quest. 32. Et tot. seq.*

Tellement que toutes ces circonstances concurrentes, c'estoit assez de motif aux Iuges pour ordonner le congrez auquel ledit appellant s'offroit, puis qu'il soustenoit auoir eu la compagnie charnelle de sadite femme, & qu'en ce cas *standum est verbo viri, qui dicit se uxorem cognouisse cap. continebatur de desponsat. impub.* attendu quel'homme est chef de la femme, & doit emporter cette prerogatiue sur elle, ioint qu'il a la presumption legale pour luy, qu'il ait cogneu son espouse *-glos. cap. inspicimus de regul. in 6. cap. literas è. de presumpt.* pource que selon le dire de Plutarque, Nature n'a point fait l'homme imparfait, ains iceluy reuestu de toutes ses parties necessaires.

Du moins pour repousser ceste pre-

somption, faut-il que les obstetrices ou sages femmes déposent le contraire, & que par l'inspection des parties secretes de la femme, ils l'ayent trouuee vierge: *cap. proposuit. ē. de probat.* Or tant s'en faut que cela se die au procès, qu'au contraire l'intimée auroit recogneu apres plusieurs feintes, auoir esté defloree par son mary, & sur ce qu'elle auroit voulu supposer, que ce n'estoit par effort viril, dont l'inspection eust peu iuger, elle ne l'auroit voulu consentir, ny les Iuges l'ordonner, quelque instanterequeste que ledit sieur appellant en ait peu faire.

Tellement que la presumptiō demeure pour luy, qu'il l'ait cōgnuē & que puis qu'il a esté lors en possession de virilité il le soit encores par l'argument de la loy *sine possidetis. C. de probat.* consequemment qu'au pis aller le congrez auquel il s'offre ne luy peut estre denié.

Et ne fait rien au contraire ce que la femme, reuestant trop tard la pudeur en lieu où elle n'est plus necessaire, obiecte que la visite de ses parties secretes & ledit congrez luy seroit à honte, car force luy est de la boire puisqu'elle est cause du mal.

*Quàm bene dispositum terris vt dignus iniqui  
Fruetus consilij, primis authoribus instet.*

Adiousté qu'en tel cas la visite est ordinaire, & partant ne peut on dire qu'il y ait dol à requerir, ce qui est de l'vsance du droict commun: Car nous apprenons de S. Cyprian en ses Epistres de S. Augustin & S. Ambroise, qu'en matiere de defloration de vierges, on a tousiours eu recours à l'inspection, mesmes qu'il nous est rapporté par Clement Alex. 7. *strom.* & par Suidas in *verbo Iesus*, que la vierge Marie l'a souffrit; ayant esté ordonné par le Synedrion du grand Prestre & Sacrificateurs qu'elle seroit visitée pour sçauoir si elle estoit demeuree vierge, & si nostre Seigneur qu'ils vouloiét coopter en leur ordre, seroit immatriculé dans leurs registres en qualité de fils de Ioseph, ou de fils du Dieu viuant & d'une vierge mere, Chassance en recite le discours tout du long. 4. partie-Catalogi gloria mundi, dist. 6.

Et bien que les liures canoniques de l'Ecriture Saincte ne nous facent mention de ceste histoire, (pource parauanture qu'elle ne touche en rien le point de nostre salut) Si est-ce que ce qu'escriit

33

S. Ambroise sur S. Luc en ces mots *maluit Christus aliquem de suo ortu quam de matris pudicitia dubitare* ne deroge du tout foy à ceste tradition.

A l'esgard du congres que ladicte Dame se dit reietter par pudeur.

*Ah si concubitus locus exigit, omnibus illum Delicijs imple & sit procul inde pudor.*

Car le Duel est bien deffendu par les Edits, pour rōpre la vengeāce des armes offensives; mais nō celuy d'entre le mari & la fēme, dōt l'aigre-doux effort ne tend qu'à les reintegrer en paix & bon amour. Tant y a qu'au cas de present *bellum iustum*, comme disoit Tite-Liue, *quia necessarium*, & la necessité rēd licite ce qui autrement seroit de foy illicite-*l. si quis id. S. doli. ff. de iurisdic. omnium indic. l. furti. §. qui iussu. ff. de ijs qui not. infam. l. si quis quasi. ff. ad Syllan. l. qui autem. §. apud Labeonem. ff. quæ in fraud. credit. gloss. l. ait vers. imputandum de minoribus.*

Ioint que comme le discours elegamment S. Augustin au liure 14. de la cité de Dieu chapitre. 18. 19. 20. 21. 22. 23. & seq. le congrez n'a rien naturellement en foy de deshonneste, il ny a que le peché

de nos premiers peres qui le rende tel &  
*ita sic geritur quod decet ex naturâ Vt etiam  
quod pudet comitetur ex pœna.*

Mais tant y a que *sacra hæc aliter non con-*  
*stant,* & puis que la preuue ne s'en peuta-  
voir autrement , force est de s'en seruir,  
notamment en vn iugement de dernier  
ressort , & par iuges qui iugent selon la  
plenitude de la puissance Apostolique à  
eux commise -*quæ summi sentit fastigia  
iuris.*

Et combien que l'on vucille dire telle  
preuue estre fallacieuse, d'autant que se-  
lon le dire du mesme S. Augustin-*cap. 16.*  
*lib. 14. de ciuitate Dei ; propter pœnam peccati  
aliquando libido hiantem destituit, & cum in  
ânimo concupiscentia ferueat friget in corpore.*

Si faut-il recognoistre que la gehêne  
& torture est vne preuue plus fallacieuse,  
d'autant que selon le dire de Quintilian  
*-ea pars corporis interrogatur quæ dolore non a-*  
*nimo. respondet :* toutes fois au desespoir de  
tirer la verité d'ailleurs on y a recours,  
d'autant que le iuge ne doit rien obmet-  
tre de ce qu'il pourra estimer luy estre  
loysible pour descouurir la verité.

De là sont venues ces preuues vulgai-  
res



res canoniques & extra-ordinaires par la troiefme , feptiefme & douziefme main de gens affermentez, par l'eauë, par le feu, par le fer ardât, par la Croix & par la Saincte Hostie, Dont parlent *Aimonius lib. 4. cap. 26.* les Loix Lombardes, *ti. quomodo quis se deffendere debeat*, les Neapolitaines, *de constit. parilib.* Gregoire de Tours *lib. 2. cap. 10.* Gratian *tota causa. 15. quæst. 5. can. qui presbyterum* 17. *quæst. 4. cap. ex literis de excess. prælat. cap. ex tuarum de purg. can.*

Comme aussi ne doit il sembler absurde que les faicts extraordinaires reçoivent de pareilles preuues, en defaut d'ordinaires. Autrement que vouloir dire entre les Iuifs l'eau probatrice pour l'adultère non auéré, entre les Allemans l'espreuue des enfans legitimes par le nage du Rhin, En Perse le foier de probation de la virginité des filles, sur lequel monta Chariclee? Et en Arcadie à mesme fin le breuuage du sang d'un Taureau sacrifié en defaut d'autre preuue?

Ou pour mieux parler, le congrez est la preuue ordinaire & plus certaine qui se puisse practiquer en telles matieres de procès d'impuissance, tesmoin Lucian

en son Eunuque. *Nec inimicum videri debet.* probationis genus quod solum est disoit Quintiliã en sa declamatiõ 7. Du moins les officialitez de France l'ont receu, & la Cour l'auroit authorisé par plusieurs arrests, notamment celuy du 20. Ianuier, 1597. donné contre vn qui argué du default de testicules ne s'y vouloit soubsmettre.

Car puis qu'il va du peril de conscience en telles ruptures ὁ μόνος τῆς ὀργῆς ἀλλὰ ὅτι τῆς συνειδήσεως pour ceste cause y faut-il apporter plus de pre-caution, dict la glose du chap. f. ē de frigid. & malefic: attendu qu'en confirmant le mariage à quelque prix que ce soit on ne scauroit faillir, venant à le dissouldre, le scandale ne peut qu'il ne soit grand pour ceux

*Hoc quicumque sacrum violarint vulnere  
non sanabile.*

Or toute la plus seure pre-cautiõ qu'on y puisse apporter est d'en venir à l'espreuue actuelle: *Nec enim de veritate dubitari potest, quoties cum incertis experimenta conueniunt, æquumque est non semper auribus sed & oculis credere,* spécialement quand nous y

sommes portez pour vn bien de paix qui sert plus à excuser vne couple licite, bien que faite à l'ouuert, que toutes les hontes clandestines ne sçauroient pallier vn diuorce illicite.

Autrement seroit-ce chose absurde que pour la verification d'un adultere on admist la preuue de celui qui diroit auoir veu *ἄφ' ἑαυτοῦ ἄφ' ἑαυτοῦ*, que pour euitier à la supposition du Part, les loix ciuiles permissent l'inspectiō du couuert de la femme, & que pour iustifier de la validité d'un mariage ( qui est chose beaucoup plus importante ) on eust à contre-cœur de voir *impactum Thyrsus horto in cupidinis*.

Car d'obiecter que la femme n'est tenue d'admettre le congrez de celuy duquel elle se dit auoir esprouué - *madido putrique simillima loro*.

*Inquina, nec lassastare coacta manu.*

C'est mettre en auant vne calomnie sans vouloir souffrir qu'elle soit conuaincue *Ἀγάπῃ τοι ἑροτῶν ἑλεγχος*.

Aussi d'insister que ledit congrez est frustratoire de la part de celuy qui confesse n'auoir aucuns testicules apparens; c'est à faire à ceux qui selō le dire de Pau-

fanias en ses Phocaiques n'ont iamais en leur vie rien veu ne creu qui surpassé le commun establissement des loix de la nature. Combien que l'aage de noz peres & le present encores porte des hommes mariez de pareille habitude que l'appellant, qui neantmoins viuent en bon ménage, & ont nombre d'enfans.

Au pis aller, si l'exemple en est si rare qu'il ne se trouue expressement decisi ne par les liures des Medecins, Theologiens, Iuriconsultes, Canonistes ou Philosophes, il n'est pas vraisemblable qu'un Iuge discret & aduisé s'en vueille faire à croire, ains se propose de l'approfondir d'autant plus meurement que la nouueauté du cas semble le meriter. Veue mesmes qu'il n'y a nul peril en l'espreue, attendu que l'inthimee par son expresse confession a dés long temps souffert que l'appellant fist ouuerture de l'Hymenee d'icelle, *Deo subigo deæ que pertundæ.*

Et ce qui vous doit dauantage esmouuoir à ordonner ledit congrés, est, que selon le dire de Plutarque, n'y a si grande noise entre mary & femme qui ne se rapaise par le liét, c'est le moyen de faire

rapprocher deux cœurs alienez, de les renouer, de les reioindre & remettre à leur premier deuoir.

*Vt penè extinctum cinerem si sulphure tangas  
Flamma redardescet quæ modò nulla fuit.*

A ce propos l'appellant pourroit s'estēdre sur le champ de la philosophie morale, & monstrier comme le mariage entre les payens mesmes a esté sacre-sainct en son entretien, qu'en la Beoce on bruloit le chariot auquel la nouvelle espousee auoit esté conduite en la maison de son mary, pour demonstrier qu'elle ne le deuoit iamais abandonner, comme à Rome on mespartissoit les cheueux de la nouvelle espousee avec la haste Celibare, pour demonstrier que comme elle auoit esté ioincte à la peau du Gladiateur, ainsi deuoit l'espousee perpetuellement adherer au corps de son mary.

Seulement le Sieur appellant par vn regret du mal-heur de ce siecle auquel les femmes soubz legers pretextes se diuorcent & soubstrayent ordinairement d'avec leurs maris, vous representera ceste plainte de Tertullian *Vbi est illa felicitas  
matrimoniorum quæ per sexcentos ferme annos*

*nulla repudium domus scripsit? at nunc in foeminais præ auro nullum est leue membrum, præ vino nullum est liberum osculum, repudium vero quasi votum est, & matrimonijs fructus.*

Chose de tres-pernicieuse consequence, tant pour le public que particulier, & à laquelle par vostre discretion vous sçaurez trop mieux donner ordre, de peur que l'issue n'en retombe au scandale de l'Eglise & au mespris de ce Sacrement ineffable par qui tout l'Vniuers de siecle en siecle subsiste en son entier, & durera tant que les Iuges se proposeront deuant les yeux à telles occurrences, qu'il ne leur appartiët de dissoudre vn lien que Dieu a conioinct avec tant de solemnitez & benedictions.

Partant conclura ledit Sieur appellant avec ces vers du tragique Senecque.

*Amor iugalis vincit ac flectit retrò,  
Remeemus illuc vnde non decuit prius  
Abire, sed nunc casta repetatur fides,  
Nam sera nunquã est ad bonos mores via,  
Quam pœnitet peccasse, penæ est innocens.*



